

Despues di exitoso bautismo di "Hey...ta pasco" 2006

Edjean Semeleer preparando pa un gran concierto den Cas di Cultura

Seccion Hubentud den Movecion a entrevista Edjean Semeleer, tocante su reciente presentacion y bautismo di su di cuatro edicion di CD "Hey...ta Pasco", cual actividad a tuma lugar den Instituto di Cultura y cu a resulta un exito, apesar di e yobida fuerte cu a interumpi e resto di e celebracion.

Nos seccion a puntra e hoben encuanto su proximo presentacion den Cas di Cultura, riba diaranzon 6 di Decèmber venidero.

BAUTISMO DI
"HEY...TA PASCO" 2006:

Un biaha mas e grupo cu a haci e parti artistico, e biaha aki e grupo di actuacion di Freddy Montoya, a bisti di blanco, pero tambe hopi hende den e publico.

Edjean a splica nos: "For di aña 2004 mi ta pidi e hendenan bin bisti na blanco. Hopi hende ta relaciona blanco cu tranquilidad, paz y pureza, locual fin di aña ta suppose di tin, aunque pa mi ta importante pa ta asina henter aña. Pesey nos ta crea un esfera di esey durante e presentacion.

Tabata tin un storia planea pakico na blanco, pero e awacero a stroba esey. Pero cu nos ta habri e temporada bisti na blanco ta un simbolo, un tradicion, un signo di dinamismo, abundancia y



cambio constante, y comosifuera cu e naturaleza ta confabula cu mi e ta yobe semper ora mi ta presenta mi CD, for di aña 1995 cu mi a presenta e prome edicion". Scogemento di padrino tabata planea for di un luna pasa. Pues no tabata algo improvisa riba e fecha di bautismo di e CD.

"Mi tin mi lista di personanan cu semper ta yuda mi y kendenan ta nifica hopi pa mi, pero mi no ta menciona nada. Cu cada un nan famia

mi ta traha un complot pa nan tey den e fecha y lugar concerni y na e momento ey nan ta haya sa. Nan ta worde sorprende, y esaki ta un forma pa mi bisa danki pa tur e apoyo y sosten ricibi pa tur e añanan".

E aña aki a scoge Mimi Rosel, cu for di tempo cu for di tempo cu Edjean a cuminsa ta promove su CD y semper ta cla pa yuda unda cu e por hacie; Jan Poets cu Edjean ta corda cu e prome biaha cu el a canta tabata den Jan Poets su bingo.

"Den Ambiente Awards mi a ricibi un reconocimiento for di Jan Poets, y e ta duna mi conseho y tambe skirbi riba mi trabao den su columna. Yvo Yanes tambe for di tempo cu mi a cuminsa e ta duna mi sosten. Mi ta corda cu el a para MC pa e prome bautismo di mi CD, sin cobra, locual mi ta gradici hopi na dje. Y Mayra Kock ken ta mi profesora di canto. Sin su enseñanza y su empeño lo mi por a perde mi stem. El a duna mi tecnica di canto den un temporada hopi fastioso, cu ta esun di cambio di stem. Mi tin cu bisa cu mi no tabata cantando na un manera corecto y mi a pone hopi presion riba mi stem locual por a dañe, pero danki na Mayra mi a logra di coregi esaki.

Nan tur a bisa mi cu nan a keda hopi honra, y sorprendi, pero en realidad e honor ta pa mi di tur e cooperacion cu mi a haya for di nan", Edjean a expresa.

E BENDICION MAS ORIGINAL:

Edjean a comenta cu e yobida pa cu semper ta cay riba e fecha cu e ta batiza su CD ta e forma mas original y espontaneo pa caba e anochi aki.

"E ta un bendicion di Dios y for di momento cu a cuminsa yobe mi a keda contento, mi di aki papa Dios ta yuda mi, y e parti mas importante ta cu e CD a worde bendiciona cu awa di yobida. Mi a laga e CD poni bao di e awacero riba te cu awa a stop", el a conta nos.

VERSION 2006:

"Hey... ta Pasco" 2006 ta un compilacion di e mehor canticanan contene den volumen un te tres. Edjean a menciona: "Mi sa cu tin hopi hende cu no tin e prome ni e di dos CD y cu tin radio cu kier toca e canticanan aki tambe, y hopi no tin esun di aña pasa door cu el a sali hopi laat. Mi a pone aden e prome cantica cu mi a graba na 1994 y esun nobo cu a ser promovi durante e bautismo, y esaki tambe ta un manera pa promove e concierto. Di cada cantante invita den e produccionnan mi a scoge nan mehor interpretacion cu nan a yega di graba, y ta un total di 19 cantica ten den dje".

E GRUPO DI FREDDY MONTOYA:

Edjean a gusta masha hopi e presentacion di e grupo di Freddy Montoya. "Mi a haye hopi creativo, alegre, cu hopi energia positivo cu a worde transmiti pa e publico. Freddy Montoya cu su grupo a traha duro y Fatme Rigaud cu a haci un trabao tremendo. E publico a gusta e show hopi y mi a scucha comentarionan hopi positivo cu tabata tin rond".

GRADICIMENTO:

Edjean a expresa su palabranan di danki, como un hoben gradici cu tur esnan cu ta colabora cune.

"Na prome luga na Papa Dios cu ta Esun cu a duna mi e talento, mi mayornan, mi ruman pa e apoyo incondicional di semper, na tur musico, compositor, cantante, corista, y tur cu ta participando den mi produccionnan, y esnan cu no ta musico pero amigo y amiga

cu ta yuda cu conseho. Na prensa cu a sorprende mi cu un cobertura grandi. Tanto corant como radio y television cu tur tabata tey y mi a haya hopi cobertura cu mi no a spera. Na mi fans masha fiel y pueblo di Aruba en general, y esnan cu a yuda haci e anochi di bautismo un realidad inolvidable: sponsor. Instituto di Cultura, Freddy Montoya, su grupo, etc., y sigur e padrinonan. Nan tur ta parti esencial di e exito di e CD, cu ta hayando un bon acogida".

ACOGIDA:

"E acogida ta bayendo hopi bon. Mehor cu e otro CDnan cu mi a saca. Hende ta bin te na mi cas, pasobra nan kier pa mi firme pa nan, y tin hende cu kier conoce mi personalmente, loke mi ta haya hopi great. Mi ta sinti cu nan kier wak bo, conoce bo mas, y mi ta spera cu e sigui asina te fin di aña. Mi ta hayando un reaccion di pueblo, similar na esun di e CD 'Aruba mi pais', Edjean a comenta.

CONCIERTO:

Ni mas cu nos a purba y a haci diferente pregunta, Edjean no kier a "los" mucho detaye riba su gran Concierto cu lo tuma lugar riba diaranzon 6 December pa 8' or di anochi, no pasobra e no kier pero debi cu e ta prefera pa e keda un sorpresa. Pero pa tur esnan cu kier haya sa un tiki mas, e.o prijs di carchi y na unda por pasa busca nan el a laga nos su number di telefon, cu ta: 593-3790.

"E plan ta pa nos duna un concierto hopi varia logicamente den ambiente di Pasco pero cu otro canticanan acerca. Lo tin cantante invita, e orquesta lo ta bao direccion di Hildward Croes; y no solamente lo tin canto, pero lo tin hopi interaccion cu e publico. Un invitacion pa pueblo di Aruba, pa tur esnan interesa pa bay Cas di Cultura, cu lo ta un anochi sumamente bunita y yen di alegria manera nos hendenan ta merece", Edjean a conclui. Seccion Hubentud den Movecion, manera semper, ta desea nos hoben cantante hopi exito cu su CD nobo, y nos kier a encurasha e publico pa ban yena Cas di Cultura, ban sinti e ambiente di Pasco na un manera sano y bunita manera mester ta, y asina tambe apoya nos artistanan valioso, tanto Edjean como tur otro musico cu lo ta riba stage, compartiendo cune e concierto aki, cu ta priminti di bira algo inolvidable.